



Trais impressaris preschents a Tavau: (da san.) Ueli Müller, Sufers, Kurt Schnyder, Val e Daniel Blumenthal, Vella.



E qua dus impressaris sursilvans: (da san.) Curdin Derungs, Uors e Sigis Schmed, Surrein.



Ils dus suprastants partents: (da san.) Hannes Parpan e Valentin Jeker.



Ed els dus èn da nov commembers da la suprastanza: (da san.) Gian-Andrea Frehner e Diego Luzio.



Marc Gianola, schef da marketing dal HCD, ha tegni in referat.



Politica ed economia unida. (da san.) Martin Schmid, cusseglier dals chantuns, Mario Beni, da nov impressari diplomà, Roland Conrad, impressari e Bernhard Poltera, dapi intginas emnas impressari diplomà.

Svietas da records èn probabel istorgia

Societad grischuna dals impressaris

DA GION NUTEGN STGIER / ANR

■ Cun dar in sguard enavos han las firmas da construcziun grischunas gi in bun onn il 2014. Cun dar in tgit en il futur sa preschenta la situaziun lura main plaschaivla. Quai betg mo pervia da l'occupaziun, mabain er cun surlavurar ed adattare il chantun la procedura da surdada da lavurs. Ils impressaris da construcziun da Tavau èn stads ospitants da lur collegas ed han organisà la radunanza 2015. Bunamain 80 impressaris èn stads da la partida e cunzunt blera prominenzia da la politica e da l'economia. La Societad grischuna dals impressaris exista dapi il 1906 e da preschent appartegnan 134 interpresas a l'uniun tetgala. President è Markus Derungs da Tavau e mainagestiun da la societad è Andreas Felix da Haldenstein.

In augment da 7%

Il 2014 è tut en tut stà in bun onn per las firmas da construcziun grischunas. Lavur han ellas gi per in import da stgars 987 milliuns francs e quai èn tuttina 7% dapli che anc il 2013. L'onn 2011 aveva la bransch da construcziun anc fatg ina svieuta da passa ina milliarda francs. Svietas da records sajan probabel istorgia, è vegni ditg tar la radunanza a Tavau. Grazia a la blera lavur da construcziun bassa, cun in augment da 31%, han ils impressaris grischuns gi il 2014 in bun onn da gestiun. Sa reducida per

1,5% è la construcziun d'abitaziuns e schizunt per 29,5% l'ulteriura lavur tar la construcziun auta. L'onn passà han las interpresas da construcziun da noss chantun occupà 4942 persunas e quai èn tuttina 4,3% dapli che anc il 2013.

Val dal Rain grischuna: In vair boom da bajegiar

Da preschent hajan las interpresas da construcziun bain anc avunda lavur, ha ditg Markus Derungs. Cunzunt en la Val dal Rain grischuna saja in vair boom da bajegiar. Quella regiun saja betg pertugada da l'iniziativa da las abitaziuns secundaras. En las regiuns turisticas saja considerabel damain lavur, gist tar la construcziun d'abitaziuns e las vistas sajan tut auter che plaschaivlas, ha ditg Markus Derungs. Tenor in studi haja l'industria da construcziun da quintar fin il 2019 cun ina sminuziun tar la lavur da 60%. Grazia a la lavur dal maun public ed a la blera lavur da construcziun bassa possian bleras firmas sa tegnair sur l'aua, ha menziunà Markus Derungs. 50% da la lavur deriva dal maun public e quai saja tuttina bler, ha accentuà il president dals impressaris da construcziun.

Dus novs suprastants

Cun bler applaus han lura ils preschents reelegi Markus Derungs sco president per in ulteriur bienni da dus onns. Sa retratg suenter 16 onns da la suprastanza

è l'impressari Hannes Parpan da Lai e per el è vegni elegi Diego Luzio da Savognin. Demissiunà aveva er Valentin Jeker da Domat e per el han ils impressaris elegi da nov en suprastanza Gian-Andrea Frehner da Domat. Confermads èn quel gremium èn vegnids: Martin Bordoli, Jenaz, vicepresidente, Oscar Gattoni, Soazza, cassier, Daniel Blumenthal, Vella, Claudio Giovanoli, Tumegl, René Hobe- negger, Brail e Maurizio Pirola, San Murrezzan.

Da las secziuns tar las regiuns

Senza ramurs han ils impressaris acceptà la nova structura da la societad. Las ovg secziuns independentas, che reunivan fin uss ils impressaris, vegnan rempazzadas entras quatter regiuns. Quai èn las suandantas: Grischun dal nord, Grischun dal sid, Grischun central e Surselva. Sa drizza als impressaris è lura er cusseglier guvernativ Mario Cavigelli. En l'avegnir vegnia il chantun a consultar pli baud e pli profund las offertas da las interpresas da construcziun. Qua tras duaian en l'avegnir convegnas davart ils pretschs esser pli baud visiblas er quai che pertutga convegnientschas da pretschs illegalas. Betg tant plaschair han ils impressaris lura gi dal scumond ch'il chantun prevesa d'introdur tar lavurs sut in mez milliun francs. Cuminanzas da lavur duaian en il futur betg pli esser lubidas sche l'import da lavur è sut 500 000 francs.



Grazia a la blera lavur dal maun public han las interpresas da construcziun anc en abundanza occupaziun.

FOTOS G.N. STGIER